



# STINAPA TA INFORMA

## RESIDENTENAN DI KUEBA

Rònt Boneiru tin kueba, speshalmente den e área di e terasa nan riba kosta Nort i parti meimei. Ora ku nos pasa for di Rincon riba Toeristenweg, òf via kaminda di Rincon nos ta mira un paisahe di baranka ku ta repartí den la horizontal. E terasa nan aki manera nos ta yama nan, a forma miónes di aña pasá i ta rekordá nos di nos historia mas antiguo. Nan a forma dor di eroshon: e disolushon di piedra di kalki dor di e áwaseru ku ta sipel dor di e piedra. E áwaseru – ku ta áside pa motibu di e dioksido di karbon ku a disolvé den dje - pokopoko tabata kome e piedra di kalki. Kon e eroshon ei ta bai bo por ripará ora bo kana den mondi. Tur e buraku i punta skèrpi den e kleps ta resultado di eroshon. E áwaseru ‘ásido’ ta keda para den e burakunan i nan ta sigui bira mas grandi atraves di aña i siglonan. Hopi biaha e kuebanan ta forma parti di un sistema suptereo di pasio. Den transkurso di siglonan pasionan di kilometer largu a forma, miéntras algun a kai den otro. Pues ora ku nos wak e entrada di un kueba, ta un pida masha chikitu nos ta wak. Pa plan di konstrukshon ta di sumo importansha pa ta na altura di e sitio di e kuebanan. Mi a yega di tende e historia di konstrukshon di un kas den Sabadeco kaminda a deskubrí ku kaminda nan kier a koba e berpùt tabatin un kueba grandi. Asta un parti di e kas a konstruí riba e ‘dak’ di e kueba. Un situashon peligroso. Na Boneiru tin komo doshen kueba, pero ta kuater so ta aksesibel pa turista. Eseinan por bishitá bou di guia di un guia di kueba. E otro kuebanan no ta ser bishitá pa no stroba e ratonnan dj’anochi ku ta biba i drumi eiden. E raton dj’anochi ta un animal nokturno, ku no ta sali promé ku solo baha pa nan yag nan kuminda. Den dia nan ta kologá kabes abou drumí, den nan kuebanan skur. Ta importante pa protehá e habitat di e ratonnan dj’anochi : nan ta indespensabel pa e eco-sistema frágil ku nos tin riba nos isla. Por ehèmpel; ta nan ta hasi posibel ku e kadushi por reproduzí. Pasobra ora ku e kadushinan ta floria anochi, ta e ratonnan dj’anochi ta pasa pa kome e nektar ku tin den e floran. E simianan di e flor ku ta keda pegá riba e kurpa di e raton dj’anochi ta keda transportá pa e próksimo kadushi. Sin e raton dj’anochi e kadushi lo disparsé riba término korto for di nos paisahe. I e kadushi ta indespensabel den nos klima seku. Sin e kadushi hopi para, barbulètè, i rèptil lo no tin kuminda. E raton dj’anochi tin un otro ventaha plasentero pa nos ser humano: un raton dj’anochi ta kome alrededor di 500 muskita pa anochi. Sin e raton dj’anochi lo tabatin hopi mas muskita riba Boneiru. Skirbí pa *Trix van Bennekom*, tradusí pa *Marcel Nahr*.

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURESA



**Traha huntu na un desaroyo duradero pa Boneiru**